

Gui'ch guxhaal San Pabl loj ree bén Éfeso rliladx Jesucrist

Rugajpdioz San Pabl bén Éfeso ree

¹ Naj Pab, najn tijb xi apóstol Jesucrist por xguialrniabee Dios. Cuan gui'ch guie par lëjt guial diidxli zinalidi xtiidx Jesucrist, lëjt guial ma najdi xbejn Dios luguiedx Éfeso. ² Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rüjnle' Dios bén rliladx ree Jesucrist

³ Quixtëë Dios, xdad Dad Jesucrist, dád benza'c najman, guial yan ma nayajc ree tijbzi con Jesucrist, ma beenle'man dunuj ree diizd xanyabaa con graloj guialnaza'c din gac yunaal ree xtiidxaman. ⁴ Laaman bacaabee dunuj ree por Dad Jesucrist diizd chi gad guidxliuj gacchaaw din yabajn ree naya sin dollojman. ⁵ Abi' guial rënman dunuj ree, diizd guia'xchej beenman guial yayajc ree xi'nman por Jesucrist zi'c beenman xgab gac. ⁶ Zeel ad racwëëzt raza't ree Dios zagdxé guial dád benza'c najman, ma beenle'man dunuj ree por Xi'nman Jesucrist, bén rënman, ⁷ bén ma gudijx por dunuj ree chi guxie' xrejman, abi' ma gojc perdon dux tol ree guial dád rën Dios dunuj ree. ⁸ Zeel dád zro' guialrajc në guialrignia' ma bazaladxaman duloj ree, ⁹ abi' ma balüüman duloj ree xhienaag naj xixgabaman diizd gocli, zi'cgajczi ma beenman xgab gac. ¹⁰ Guiáad xgab guin gacan

cumplid chi guidxin dxej, Dios gusa'n gra loj Jesucrist zi'c ni yu' xanyabaa në loj guidxliuj.

¹¹ Nētëë guial nayajc ree tijbzi con Jesucrist, Dios ma bacaabee dunuj ree din yayajc ree par laaman zi'c naj xixgabaman diizd guia'xchej, din laaman rüjn gra zi'c rënman gac. ¹² Abi' laaman ma been zian, din dunuj ree nayajc ree bén yaloj bililadx Jesucrist, yayajc ree bén guza't laaman zagdxe por xguialrniabeeman. ¹³ Nëgajc lëjt chi biguejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c rëb Dios guial guneeman xSprijtaman, dxel yan guial ma nabannëdi laaman, laaman naj zi'c tijb sen ni rulüü guial ma najdi par Dios. ¹⁴ Guial ma nabannë xSprijt Dios dunuj ree, yaca' ree ni rëb Dios guneeman chi ma bara xbejnman za' xanyabaa, din chitëë yacwëöz yaza't reeman zagdxe por xguialrniabeeman.

Rniab Pab quiarguejn loj Dios

¹⁵ Abi' guial ragbeen rliladxidi Dad Jesús rën tëedi los demazri ree bén naj xbejn Dios, ¹⁶ zeel ad rucwëëzt rudën quixtëë loj Dios por lëjt, beegaj rbedx rniaaban laaman. ¹⁷ Laaman naj Dios rniabee diizd xanyabaa, xDad Dad Jesucrist. Rniaaban lojman yazaladxaman quiarguejn lojdi din chignia'di ni gulüüman lojdi gusnuu tëë güünbeedi laaman mazri. ¹⁸ Rniaaban lojman din guixhialaman xquiarguejndi din chignia'di xhie rën guiëb ni rbëzidi diizd chi bacaabeeman lëjt, chignia' tëedi guial ni za'cdxoon narooob tëë naj ni nagu'chaaw

Dios par ree bén naj xbejnman. ¹⁹ Rniaab tēen lojman guial gagbeedi guial dád narooob naj xguialrniabeeman ni cayagnē dunuj ree raliduladx reeman. Laagajc guialrniabee narooob guin balüü Dios ²⁰ chi basbanman Jesucrist abi' gule'caman laaman xladbeeman xanyabaa ²¹ lod badēēman guialrniabee lojman ni mazri lasajc guial loj gra ree guialrniabee, nē loj gra guialguxtis nē loj gra gobiarn. Abi' mazri lasajc guialrniabee guin guial loj gra ree guialrniabee yu', nē ni qui chu'ri ree loj guidxliuj guie. ²² Dxel basa'n Dios gran loj Jesucrist, bacaabeeman laaman din nabeeman gra ree bén rliladx laaman. ²³ Guiáad ree bén rliladx laaman, guidiblagaa nabannēman laa reeman abi' bantēēz guin za'man din laaman guidiblagaa rniabee.

2

Nayajc ree perdon guial rēn Dios dunuj ree

¹ Gocli gojquidi zi'c bengüt loj Dios por ree ni mal nē por ree dol ² ni beendi guial binalidi nejz mal been tēēdi zi'ctzi rēn xindxab güündi, sprijt-mal ni nabannē gajc ree bén ad ruzoobt xtiidx Dios. ³ Du gra ree ziangajc babajn ree guia'xchej. Baguieen ree zi'ctzi bayēn ree, zi'ctzi goc dux xgab ree, abi' zi'cgajc rayal ree bén ad ruzoobt xtiidx Dios casti, ziangajc nayal ree casti. ⁴ Per guial raya da't Dios dunuj ree rēn tēēman dunuj ree, ⁵ zeel majsi bayajc ree zi'c bengüt lojman por dux tol ree, per yan ma raya'p ree guialnaban lojman con Jesucrist. Guial tant benza'c naj Dios, zeel nayajc ree perdon. ⁶ Chi basbanman Jesucrist nēgajc dunuj ree basbanman abi' zi'c rulüü ma

nadxu'nè' ree Jesucrist xanyabaa. ⁷ Dios been zian din dxej zëed ree guiguien guial dád rënman dunuj ree, abi' benza'c tée najman con dunuj ree por Jesucrist. ⁸ Guial naj Dios benza'c, zeel ma nayajc ree perdon, ad guial nayajct ree benza'c lojman. Por guial rliladx zëed xperdon Dios. ⁹ Ni'quid por ni zagdxe ni ma baguieent ree zëed perdon guin chitëe chu guilies xvalor gajc. ¹⁰ Por Dios nadxu' ree loj guidxliuj guie abi' por Jesucrist bachaaman mod babajn ree yaløj din yaguieen ree ni zagdxe zi'c beenman xgab yaguieen ree diizd gocli.

Tijbzi nayajc ree por Jesucrist

¹¹ Zeel lëjt bén ad najt ree bén Israel, gol basaal-
 adx xhienaag guzajquidi yaløj. Bén Israel ree
 gulëelaj lëjt bén ad yu't ree sen guial yu' reeman
 sen zi'c rniabee ley. ¹² Tiamp zii ad beenbee-
 tidi Jesucrist, ad gojctidi cwent loj ree bén Israel
 ad gojc tëetidi cwent guial rayalidi ni rëb Dios
 gudëeman loj ree xbejnman. Contzi gubajndi
 achet gulëjzidi ad gubajnnë tëetidi Dios. ¹³ Per yan
 guial ma rliladxidi Jesucrist, lëjt guial guzujdi zijt
 loj Dios, por xrejñ Jesucrist ma bibiguidi lojman.
¹⁴ Din Jesucrist babe'cdxe du luxdoo ree. Laaman
 bisüd guialrdxe'ch ni rudxoon gac ree bén Israel
 tijbzi con ree bén ad najt bén Israel. ¹⁵ Abi' por
 xguialgüjt Jesucrist gulox gra ree costumbr rni-
 abee xley ree bén Israel güün ree bejn, laaman
 been persi gojc ree bén Israel con ree bén ad najt
 bén Israel zi'c tijbzi guiedx cüb guial ma nayajc
 ree tijbzi con laaman. Zian babe'cdxeman luxdoo
 ree bejn. ¹⁶ Din por xguialgüjt Jesucrist loj crüzj
 ma gulox guialrdxe'ch lasa' ree bén Israel con ree

b n ad najt b n Israel, abi' ma nadxu'n ' ree Dios zagdxe guial ma nayajc ree tijbzi por Jesucrist. ¹⁷ Abi' laaman bidgagojn dugra ree, zi'c ree b n Israel zi'c ree b n ad najt b n Israel xhienaag yadxu'n ' ree Dios zagdxe. ¹⁸ Dxel por Jesucrist grop cwaa ree bejn ma rajp nejz par loj Dios guial tijbzi naj xSprijt Dios nabajnn ' ree. ¹⁹ Zeel ad najtridi zi'c b n z ed lod ren, zi'c benzit loj Dios, ma najdi cwent loj ree xbejnman, ma najdi tijbzi con ree xbejnman. ²⁰ L jt naj zi'c xze' tijb yu ni cayajc, gui ad ree xi ap stoles Jes s con ree b n bad e xtiidx Dios loj ree bejn, naj reeman zi'c xcimiant yu guin, gui ad Jesucrist naj zi'c guiaj zobjloj ni cayajcn  yu guin. ²¹ Abi' guial yagaj guzuloj cayajs yu guin, dxel cay 'pzi cay 'p ze' guin ni cayguie'ch ree najdi din yayajc ree tijbzi xyadoo Dios con Jesucrist. ²² N  yan guial ma najdi tijbzi con Jesucrist ma naj t edi tijbzi con los demazri compniar raliduladx reeman din yayajc ree tijbzi yadoo lod za' Dios por xSprijtaman.

3

Cwabee Pab din chigneeman xtiidxza'c Jesucrist

¹ Por zianan yu'n ladxguiib, naj Pab guial cay nan sirv loj Jesucrist din g nan yudar l jt b n ad najt ree b n Israel. ² L jt ragbee guial naj Dios benza'c zeel baneeman dxiin guin lon din g nan l jt yudar chignia'di xtiidxaman. ³ Abi' laaman bal   naj xhienaag naj xixgabaman diizd gulal, zi'cgajczi ma rnin lojdi diizd guia'xchej. ⁴ Chi goolidi laan, gagbeedi guial ma ragbeen xhienaag naj xixgab Dios par Jesucrist. ⁵ Tiamp gulal achut gojc

niagbee xhienaag naj xixgabaman par Jesucrist, gojcan zi'c tijb ni naguie'ch par ree bejn. Per yan por xSprijtaman ma balüüman laan loj ree xi apóstoles Jesús në loj ree bën badëë xtiidx Dios loj ree bejn. ⁶ Abi' ni goc zi'c tijb ni naguie'ch par ree bejn naj guial por xtiidxza'c Jesucrist, në ree bën ad najt bën Israel ma rayal ni gudëë Dios loj ree bën Israel guial ma naj reeman tijbzi, dxel ziangajc ma nayab reeman loj promejs ni been Dios por Jesucrist.

⁷ Naj cugojn xtiidxza'c Jesucrist loj ree bejn, ad guial rayalt gūnan dxiin guin. Guial naj Dios benza'c, zeel bazaladxaman guialrniabee lon par gūnan laaman sirv. ⁸ Naj naj bën bigra bën lasajc ta'nz loj gra ree xbejn Dios, per guial naj Dios benza'c, bacaabeeman naj din gūn diidx loj ree bën ad najt bën Israel xcwent xguialnaza'c narooob Jesucrist, ⁹ në par gugojnan zagdxe gra reeman xhienaag naj xixgab Dios bën been gra, xgab ni ad balüü gajtaman loj ree bejn. ¹⁰ Din yan zi'c naj ree bën rliladx Jesucrist, gagbee gra ree bën rajp guialrniabee xanyabaa guial gra lojczy guialrajc rajp Dios. ¹¹ Abi' diizd chi gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist. ¹² Në guial raliduladx ree Jesucrist ma raya'p ree nejz par loj Dios, abi' con confians ma zajc yubiig ree lojman. ¹³ Zeel rnin lojdi ad runayadi por ree guialzi ni cadëëdan por lëjt, din zagdxen par lëjt.

Dád rën Jesucrist dunuj ree

¹⁴ Zeel ruzuxiban loj dux Dad ree Dios;
¹⁵ laaman naj Dad loj gra ni yu' loj guidxliuj

në xanyabaa. ¹⁶ Abi' rniaaban lojman por xguialrniabee narooberman yazaladxaman lëjt gojl në guialrniabee por xSprijtaman din yayu luxdoodi, ¹⁷ guibannë tēēdi Jesucrist guial rliladxidi laaman. Din zian zi'c diidxli zinalidi zi'c rēn Jesucrist dunuj ree, ¹⁸ dxel ma zajc gagbeedi con los demazri ree compniar raliduladx ree laaman guial gudēdlaj abi' xt banczi naaloj zro' rēnman dunuj ree. ¹⁹ Zeel rniaaban loj Dios gagbeedi plact rēnman dunuj ree, guial mazri zro' najn guial loj ni raguieen ree xgab, abi' zian guidiblagaa guibannēdi Dios.

²⁰ Laaman, guial rajpaman guialrniabee par güünman mazri guial loj ni raguieen ree xgab o mazri guial loj ni ranaab ree lojman por xSprijtaman bén nabajnnē' ree, ²¹ abi' rayal yaza't reeman zagdxe gra dxej në gra tiamp por Jesucrist, dunuj ree guial raliduladx ree Jesucrist. Amén.

4

Nayajc ree tijbzi por xSprijt Dios

¹ Naj, yu'n ladxguiib guial cayünan sirv Jesucrist, rniaaban lojdi zi'c ma najdi xbejn Dios, gol gubajn zi'c rayal guiban ree bén ma naj ree xbejnman.

² Gol gojc benza'c në bén naxanladx, gol gojp pacens gol gudaan tēē lasa'di guial rēn lasa'di.

³ Gol been naguiejn gusnuu gaquidi tijbzi con xyudar xSprijt Dios bén rabe'cdxe du luxdoo ree par yayajc ree tijbzi. ⁴ Dunuj ree nayajc zi'c tijbzi cuerp, abi' dugra ree nabajnnē' xSprijt Dios, abi' zi'c ma nayajc ree xbejn Dios, ziangajc ralējz ree ni guneeaman. ⁵ Tijbzi Dad, tijbzi guialrliladx në

tijbzi guialriobnijs raya'p ree. ⁶ Din tijbzi Dios yu', bën naj Dad par dugra ree, rniabeeman dugra ree, nabannëman dugra ree rüjn tëëman ujs dugra ree.

⁷ Per tijb gaj dunuj ree ma naj ni yaguieen ree, zi'ctzi ni baneë Jesucrist yaguieen ree. ⁸ Zianan zeel rëb loj xtiidx Dios:

Chi bayë'paman xanyabaa,
beenman gan loj gra guialrniabee,
abi' badëëdaman loj ree bejn ni rayal güün reeman.

⁹ Abi', ¿xhie rën guiëb lod rëb “bayë'paman”? Rën guiëban bi'taman loj guidxliuj. ¹⁰ Guiáad Jesucrist bën bi't loj guidxliuj, laagajcaman naj bën bayë'p xanyabaa persi canabeeman guidib guidxliuj në xanyabaa. ¹¹ Abi' ma badëëman loj ree bejn ni rayal güün reeman, yu' reeman bayal gac apóstoles, yu'za reeman bayal gac bën rudëë xtiidx Dios loj ree bejn, yu' reeman bayal gutie'ch xtiidxaman, yu' tëë reeman bayal gudëë consejw gulüü tëë reeman bën rliladx ree laaman. ¹² Zian bacaabee Jesucrist bejn ree din gusiid los demazri ree bën rliladx laaman, gac tëë güün reeman laaman sirv, gusnuu tëë güünbee reeman laaman, ¹³ xt yayaaloj yaliduladx ree yaguieenbee tëë ree Xi'n Dios guidiblagaa, din yayaaloj yayignia' ree xhienaag rayal yunaal ree Jesucrist. ¹⁴ Dxel ad zayajctri ree zi'c ree xindoo rliladx xhietëëznin, ad zayajctri ree zi'c tijb ni rnë bi niz ni niz guie por graloj ni rü ree bën raguiil mod gusquiee ree bejn, ¹⁵ rayal yayën du lasa' ree, yadü ree diidx yunaal tëë ree ni diidxli din gusnuu yayignia' ree yaguieen tëë ree zi'c rën Jesucrist bën rniabee dunuj ree. ¹⁶ Din por Jesucrist nayajc ree tibloj gra

ree compniar raliduladx ree laaman. Por laaman nadxajc dulasa' ree nayajc ree tijbzi, abi' tijb gaj dunuj ree con ni rayal yaguieen ree par yaguieen du lasa' ree yudar din gusnuu yayèn dulasa' ree por Jesucrist.

Guialnaban cüb con Jesucrist

¹⁷ Yan por Jesucrist rnin lëjt: Ad bal guibanridi zi'c naban ree ben ad nünbeet Dios, din laa reeman naban zi'ctzi naj xixgab reeman, ¹⁸ nacay xquiar-guiejn reeman, ad rajpt reeman guialnaban rën Dios gap reeman, guial ad rignia't reeman ache tëët naladx reeman. ¹⁹ Ma been luxdoo reeman gojl, ma gulëëladx laagajc reeman abi' cusnuu cayüjn reeman graløj nidxuudx. ²⁰ Per lëjt ad beenbeetidi Jesucrist din guibandi zian, ²¹ bal walidi ma biguiejndi xcwentaman bal wali tëëdi ma basiididi diidxli zëed por laaman. ²² Gol basa'n zi'c gubandi yaløj, din ruxhiinzi zi'c gubandi yaløj con xgabmal ni basquiee lëjt guial beendi zi'ctzi guyëndi. ²³ Gol been naguiejn guidxaa xixgabidi guidiblagaa ²⁴ din gaquidi zi'c tijb bencüb been Dios zi'c rënman, con tijb guialnaban naya në zi'c rayal por xdiidxliman ni ma biguiejndi. ²⁵ Zeel ad bal rnieeridi diidx rusquiee. Gol gunee diidxli con xcompniaridi din tijbzi nayajc dugra ree con Jesucrist. ²⁶ Bal rdxe'chidi, ad güündi dol. Ad gudxe' guialrdxe'ch guin luxdoodi dëchej, ²⁷ chitëë tiëbidi güün xindxab lëjt gan. ²⁸ Bén rban, rayal gucwëez cwanman abi' güünman dxiin, din con dxiin zagdxe güünman dxel ma rajpaman con xhie güünman yudar bén ryaadx ree xhienin. ²⁹ Ad

rníee tēēdi diidxguijdx, gol gunee ganax diidxza-gdxe ni gūūn yudar chignia' ree ben ren bén gu-caagdiajg ree laan din gūūnan laa reeman sirv. ³⁰ Ad rgu'nayadi xSprijt Dios, bén ma nabannēdi zi'c tijb sen guial ma najdi xbejnman par dxej ni guidxindi lojman. ³¹ Gol basa'n tiblād gra guialralenya', guialrdxe'ch, guialralen lasa', guialrguidxa'nē lasa', guialrníee diidxguijdx loj lasa' nē graloj ni mal. ³² Gol gojc benza'c, gol baya lasa'di gol been tēē lasa'di perdon zi'c been Dios lējt perdon por Jesucrist.

5

Zi'c rayal guiban ree Xi'n Dios

¹ Zi'c ma najdi xi'n Dios bén rēnman, gol been naguiejn gūūndi zi'c laaman. ² Gol gubajñ zagdxe, gol guyēn lasa'di zi'c guyēn Jesucrist dunuj ree abi' bayū laagajcaman gūjtaman por dunuj ree, gojcaman zi'c tijb gon ni rliāa nejxh par Dios.

³ Yan lējt guial ma najdi xbejn Dios, ad rayalt guínee loj lasa'di diidx dxuudx, ni'qui graloj ree ni ad rüjnt sirv ad rzēēbladx tēēdi gra par lējt. ⁴ Ad rnieedi diidxguijdx ree, diidxtont ree, diidx ni ad rayalt guíneedi din ad ni zagdxet reen. Mazri zagdxe gol badēē quixtēē loj Dios. ⁵ Din lējt ma ragbee guial ree bén naban nadxuudx nē ree bén rüjn ni ad rüjnt sirv, nē ree bén rzēēbladx gap gra (mazri yu'guijc reeman ni guin ree luar guíēn reeman Dios), dxel ad zile't chu' reeman lod rniabee Jesucrist con Dios. ⁶ Gol gojp cudad achu gusquíee lējt con ree diidx ad rüjnt wen, din por

ree ni guin zëed xcasti Dios par ree bén ad ruzoobt diidx. ⁷ Zeel ad güündi zi'c rüjn reeman.

⁸ Gocli gubajndi zi'c tijb bén nayaaw xquiarguiejn, per yan guial ma najdi tijbzi con Jesucrist, laaman naj biani par lëjt. Zeel gol gubajn zi'c ree bén ma zinal biani guin, ⁹ din guial chinal bejn biani guin ma zile' güünman ni zagdxe zi'c rayal, nē ni naj diidxli. ¹⁰ Gol been naguiejn gol been zi'c ruladx Dios. ¹¹ Ad nē lëjt güün ni ad rüjnt ree sirv ni rüjn ree bén nayaaw xquiarguiejn, gol guneenē reeman din gagbee reeman ni rüjn reeman. ¹² Din xt ratu bejn güman ni rüjn reeman ralan. ¹³ Per por xtiidx Jesucrist laa gagbee gajc reeman xhienin rüjn reeman. ¹⁴ Din zianan zeel rēb loj xtiidx Dios: Batie'ch xbaaalil, lüj guial zinalil nejz mal. Bariica loj dol din gusni Jesucrist xquiarguiejnl.

¹⁵ Zeel gol gojp cudad xhienaag nabandi, ad gontzi guibandi, gol gubajn zi'c bén yu' xquiarguiejn. ¹⁶ Gol been naguiejn guibandi zi'c rayal naga yu' tiamp, din lēn ree dxej guie ad xnejztri naban bejn. ¹⁷ Zeel ad gontzi nabandi zi'c naj xixgabidi, gol beenli naguiejn chignia'di xhienaag rēn Dios guibandi. ¹⁸ Ad südxidi, din guial-rzüdx guin ruxhiin bejn. Zagdxeli gol cwējb nabee xSprijt Dios luxdoodi guidiblagaa. ¹⁹ Chi rünē lasa'di diidx, gol baza't ni ca loj ree salmos, loj ree himno, nē gra loj ree cant ni naj par Dios. Abi' guidib luxdoodi gol biil gol baza't tēē Dios zagdxe. ²⁰ Abi' guixie guixie gol badēēd quixtēē loj dux Dad ree Dios por Dad Jesucrist por gra ni rüjnman par dunuj ree.

Zi'c rayal guibannē lasa'ree bén riladx Jesucrist

21 Gol bazoob xtiidx lasa'di por respejt ni raj-pidi Jesucrist. 22 Nè lëjt búngunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist. 23 Din xinguaaaw ree rniabee lacheel zi'c rniabee Jesucrist bèn rliladx ree laaman, bèn babëë laa reeman loj dol abi' naj reeman xbejnman. 24 Abi' zi'c ruzoob ree bèn rliladx Jesucrist xtiidxaman, ziangajc ree búngunaa rayal guzoob xtiidx lacheel reeman. 25 Négajc lëjt xinguaaaw nuxhliaa ree, gol guyën lacheelidi zi'c rën Jesucrist bèn rliladx ree laaman, abi' xt güjtaman por laa reeman 26 persi bisüdaman xtol reeman, basiaman laa reeman por xtiidxaman nè por gualrirobnis, 27 din guidxin reeman lojman nix da't nè ni'qui tijb ni mal, sin falt o dol ren ree, guidxin reeman lojman nayadxuj sin dol. 28 Yan ziangajc ree xinguaaaw baxhliaa, rayal guiën lacheel reex zi'c rën laagajc reex. Abi' xin rën lacheel, laa gajquixan rën. 29 Din ni'qui tijb bejn ad rdxe'cht laagajcaman, ruyaanli laagajcaman rniajchi' tée laagajcaman zi'c rüjnnë Jesucrist dunuj ree nayajc ree bèn rliladx laaman 30 guial nayajc ree tijbzi con laaman. 31 Zeel zi'c rëb loj xtiidx Dios: “Xinguaaaw gusa'n xdad xniaax din gaquix tijbzi con lacheelix abi' grop reex ma naj tijbzi bejn.” 32 Dád nawëëg naj par chignia' bejn diidx guie ree, per caninan din zian naj Jesucrist con ree xbejnman. 33 Yan, xinguaaaw ree, gol guyën lacheelidi zi'c rën lëjt gajc. Guiáad lëjt búngunaa, gol gojp respejt lacheelidi.

6

1 Nè lëjt najdi xi'n, guial zinalidi Jesucrist, gol

bazoob xtiidx ree xdadidi, din zian rayal güündi. ² Abi' mandamient yaloj ni rëb guial yu' ni yaca' ree bal yaguieen ree ni rëb: “Gojp respejt xdad xniaal, ³ din guibanl zagdxë guiban tëël xchej loj guidxliuj guie.” ⁴ Nëgajc lëjt dad na ad gusagdiaj xi'ndi chitëë guidxe'ch reex por zian. Mejrli gol basni's reex zagdxë, gol guneenë reex gol balüü tëë reex zi'c rën Dios. ⁵ Në lëjt bén rüjn ree xchiin bejn, gol bazoob xtiidx bén naj xpatrondi loj guidxliuj guie. Con guidib luxdoodi gol gojp respejt gol bazoob tëë xtiidx reeman, gol gunaladx xchiin Jesucristan cayüjndi. ⁶ Gol been reeman sirv ad chi ruguiaatzi reeman lëjt par yaya'ndi zagdxë loj reeman, gol gunaladx guial Jesucristan cayüjndi sirv guial diidxli cayüjndi zi'c rën Dios güündi. ⁷ Gol been dxiin con gan, gol gunaladx xchiin Jesucrist cayüjndi, ad xchiint bénguidxliuj. ⁸ Din lëjt ma ragbee guial tijbgaj bejn majsi bén rüjn xchiin bejn o bén ad rüjnt xchiin bejn, per gudëë Jesucrist ni rayalaman zi'ctzi naj ni zagdxë beenman. ⁹ Nëgajc lëjt bén naj ree patron, gol gojc benza'c con ree xmojsidi, ma gojczy rusagzidi laa reeman, din lëjt ragbee guial bén rniabee laa reeman në lëjt yu'man xanyabaa, abi' ad rbetaman loj bejn.

Gol guzudxi'ch loj ni riladxidi

¹⁰ Rni tëën lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xguialrniabee narooberman. ¹¹ Gol gojp lëjt gajc con xguialrniabee Dios din sudxi'chidi chitëë güün xindxab lëjt gan con ree ni rusquiee. ¹² Din ad cayguieent ree naguiejn

yaguieen ree gan loj tijb ni naj bëel në dxijt, caydijl ree con gra loj sprijtmal zi'c ree ni rajp guialrniabee, guialguxtis në gra loj xsprijt xindxab ni yu' ni canabee tëë loj guidxliuj guie. ¹³ Zeel gol gojp lëjt gajc con xguialrniabee Dios din chile' taandi xhietëëz loj guialzi gui't sudxi'ch tëëdi loj xhietëëz ni saquidi.

¹⁴ Gol guzudxi'chcliza por ni diidxli ni ma ragbeedi, gol basnuu tëë zi'c rayal guibandi. ¹⁵ Gol guzusin par guinieedi xtiidxza'c Jesucrist din por laan yadxu' ree zagdx con Dios. ¹⁶ Gol badxe'guijc tëë guial guialrliladx ni rajpidi naj ni ragnë lëjt loj gra ni zëed por xindxab. ¹⁷ Në ni been Dios perdon xtolidi, laan naj ni rutëë lëjt, guiáad xtiidxaman naj zi'c tijb espad ni runee xSprijt Dios lojdi. ¹⁸ Ad gucwëëz cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusin par cwedx guiniabidi laaman, ad gucheeladxidi, gol gurejdx tëëman por gra ree xbejnman. ¹⁹ Gol gurejdx gunab tëëman por naj din yazaladxaman naj diidx ni rayal ganen din ganen sin guialrdxeb xtiidxza'c Jesucrist ni zidnë perdon. ²⁰ Dios bacaabee naj par ganen xtiidxza'caman, abi' por zian yu'n ladxguiib. Per gol gurejdx gunab Dios chitëë gadxeban gүн xtiidxaman zi'c rayal gүнan.

Diidx bigra ca ree loj gui'ch guie

²¹ Tíquico, tijb du lasa' ree bén rayën da't ree, abi' diidxli cayünman dunuj ree yudar cayguieen ree sirv Jesucrist, laaman gugojn lëjt gra xhienaag za'n xhie tëë cayünan, ²² din par zianczi caxhalan laaman din gugojnman lëjt xhienaag nadxu'n niz

guie yagu' tääman luxdoodi. ²³ Rniaaban loj Dios guial gra ree bén rililadx Jesucrist, cwe'cdxeman luxdoo reeman guiën tää lasa' reeman, chililadx tää reeman laaman në Dad Jesucrist, ²⁴ güünle' tääman gra ree bén wali rën Dad Jesucrist.

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

fb4ebcb8-e1f4-5bfc-b08c-f590e137d86d